

ԱՐԾԻՎԸ

Մ. ԲՐՈՈՒՆ

Բարձր՝ր, բարձր՝ր անմատչելի ժայռերում արծիվը հյուսել էր իր բունը: Այնտեղ, ժայռի բարձունքին, մի պատըռվածքում, մի ծերպում ծեփված կպած էր նա և սառը հողմից, հյուսիսի սառցեղեն շնչից նրան պաշտպանում էր ժայռը իր քարեղեն կրծքով: Նա շինված էր ուռենու ոստերից ու փաթաթված-պատած ամուր ձիու մազով: Մայր արծիվը խնամքով օթևան էր շինում իր սերնդի համար: Եվ ջանում էր շինել հաստատուն, հարմար ու տաք: Եվ նրա երեք փոքրիկ ճուտերը միանգամայն գոհ էին: Նրանց համար դրանից լավ բուն աշխարհքումն էլ չկար: Դեռ նոր ձվից դուրս եկած՝ իրարու սեղմ կպած նստած էին նրանք: Հենց արևը ծագեց թե չէ՝ նրանք իրենց գլխիկները բնիցը դուրս հանեցին ու զարմացած նայեցին Աստուծո աշխարհքին, և աշխարհքը նրանց թվաց հրաշալի: Ներքևում հեռո՛ւ, հեռու տարածվում էր անսահման տափակ հարթավայրը: Միակե՛րպ, միակերպ. միայն արմինայի փոքրիկ թփերն էին բծավորում նրա երեսը: Երբեմն դաշտային ճագարներն ու շներն էին այստեղ-այնտեղ երևում ու թաքնվում սեզերում: Եվ չէին հասկանում արծվի ճուտերը, թե ինչու էին իրենց սրտերը հուզվում ու թրթռում էն փոքրիկ վազող գազաններին տեսնելիս: Հեռու հարավում հորիզոնի վրա երևում էր մի նեղ շերտ՝ մին բաց մոխրագույն, մին կապտավուն: Սկզբում ձագուկները չէին իմանում, թե էն ինչ բան էր. բայց երբ աչքները զորացավ ու կտրեց, տեսան, որ գետ էր: Հենց այն գետիցն էր մայրը նրանց համար համեղ ձուկը բերում: Ուշի ուշով դիտում էին արծվիկներն ամեն

բան իրենց շուրջը, ծանոթանում էին իրենց շրջապատող աշխարհքի հետ: Երբ որ հոգնում էին բնությունը դիտելուց, թուած գալիս էր մայրը իրիկվան ընթրիքով: Կուշտ-կուշտ ուտելուց հետո քաղցր քնում էին նրա թևերի տակ:

էսպես անցավ ժամանակն, ու մեծացան փոքրիկ արծվիկները: Նրանցից մինը դուրս եկավ ամենից մեծն ու ամենից ուժեղը: Նա խելոք էլ էր մյուսներից, շատ էր մտածում շորս կողմի ամեն բանի վրա ու միշտ հարցնում էր մորը, թե ինչ տեսակ տեղեր են, որ նա գնում է: Մայր արծիվը պարծենում էր իր զավակով, հավատում էր, որ նա ժամանակին դառնալու էր ամենամեծն արծիվներից: Ու տվեց նրան մեծ ռազմիկ արծվի անունը — Թառլան, և պատմում էր ամեն բան, ինչ որ տեսել կամ լսել էր իր կյանքում:

Մի անգամ էլ, երբ Թառլանը սովորել էր մագլցել ժայռերով, հասավ իր մորը, որ թևերը ծալած նստած էր բարձր, սրածայր ժայռի կատարին: Մայրը չնկատեց նրա մոտենալը, անթարթ նայում էր հեռու:

— Մայրիկ,— ասավ Թառլանը,— պատմիր ինձ հայրիկի մասին:

Մայրիկը տխուր էր ու լուռ:

— Մայրի՛կ, պատմիր ինձ հայրիկի մասին,— կրկնեց Թառլանը:

— Լավ, իմ քաջ Թառլան,— խոսեց մայրը,— կպատմեմ քո հոր մասին: Էնտեղ, ներքև մի արարած է ապրում, որ մարդ են ասում: Չար ու կատաղի արարած է նա: Ոչ մի շունչ կենդանի չի ազատվում նրա խստությունից: Ումնէ կյանքից զրկելը նրանց մեջ համարվում է քաջագործություն: Սպանելու համար նրանք մի զարմանալի գործիք ունին, որ զարկում է շատ հեռվից: Մի անգամ ձեր հայրը որսից տուն էր վերադառնում: Ես տեսա, թե ինչպես նա սկզբում դեռ թռչում էր բարձր ամպերի տակ, հետո, թռիչքը մեղմելով, սկսեց ներքև իջնել: Մին էլ հան-

կարծ ներքև, երկրի երեսին բարձրացավ մի փոքրիկ ամպի նման սիպտակ ծուխ, ետևից մի տարօրինակ կարճ ճայթյուն, ու հայրդ թևերը թափահարելով սկսեց ընկնել, ընկնել ցած ու ցած:

Քարի կտորի նման գետին ընկավ իմ հպարտ, արքայական ամուսինը ու... էն ընկնելն էր, որ ընկավ:

էստեղ լռեց մայր արծիվը, ու երկար իրար կողքի նստած էին մեր ու որդի: Թառևանը չէր խոսում, բայց աչքերը վառվում էին, սիրտն էր ընկել մարդու ահն ու ատելությունը: Ազատ, վայրենի հավքը առել էր իր մահացու թշնամու հոտը:

— Թառևան, դու շատ ես նման քո հորը,— նորից խոսեց մայրը,— իսկ հայրդ ամենահզորն էր արծիվների մեջ: Դու կլինես հզոր ու գեղեցիկ նրա պես, բայց լսիր, զավակս, չմոտենաս, երբեք չմոտենաս մարդկային բնակարանի, որովհետև մարդ ասված հրեշի շարունակյալն ու խորամանկությունը չափ ու սահման չկա: Միտդ պահիր, ինչ որ ասում եմ քեզ:

— Միտս կպահեմ, մայրիկ:

Մի քանի ժամանակից Թառևանը սկսեց թռչել սովորել: Օր օրի վրա ուժեղանում էր ու մեծանում: Թևերն աճում էին ու ամրանում: Մայրը նրա հետ փոքրիկ զբոսանքներ էր անում: Հետզհետե երկարում էին այդ զբոսանքները: Մի օր էլ, երբ մայրը թռավ դեպի գետը, նա էլ թռավ մոր հետ: էստեղ մայրը նրան սովորեցրեց ձուկ բռնելը: Ու... ձուկ բռնելում էն տեսակ ճարպիկություն ցույց տվավ ու էնպես տարվեց, որ էլ չէր ուզում տուն վերադառնա: Դրանից հետո ամբողջ գիշերը երազում էր նա, թե ինչ մեծամեծ գործեր պիտի կատարի, երբ մեծանա, դառնա հզոր, հասուն արծիվ ու թողնի մայրական բունը: Ամբողջ գիշերը երազում էր արձակ գետը, ու առափնյա ալիքների ճղփյունը օրորում էր նրան: Ու ամբողջ գիշեր Թառևանը չկարաց քնի:

Սրանից հետո շատ ժամանակ չանցած՝ Թառևանը թողեց

մայրական բունը: Թափահարեց իր ուժեղ թևերն ու սլացավ դեպի հարավ-արևմուտք, հեռո՛ւ, հեռո՛ւ: Անցավ անշուր անապատների ահռելի տարածությունների վերևից, թավուտ, կուսական անտառների գլխներից, ճախրեց ձյունապատ սարերի վայրի գագաթներից, իջավ գեղազարդ հովիտներ: Հովիտներում տեղ-տեղ նա նկատում էր տարօրինակ առարկաներ, որ սկզբում խոշոր քարերի տեղ էր դնում, բայց շուտով հասկացավ, որ խրճիթներ էին — մարդու բնակարանը:

Նա թռչում էր բարձր՝ նրանց վերևից և միայն զարմանում էր, թե ինչու են ներքև մարդիկ խմբվում ու ձեռքերով ցույց տալիս վերև՝ դեպի երկինքը: Նրա մտքովը չէր էլ անցնում, թե ինքը դարձել էր մեծ ու հզոր արծիվ, և թե իրեն վրա էին հիանում մարդիկ:

Ճանապարհը շարունակելով դեպի արևմուտք՝ հասավ մի գետի, որի նմանը չէր տեսել իր օրում: Էնքան լայն գետ էր, որ ասես թե մյուս ափը չկար: Ալիքները գոռալով դիպչում էին ափի ժայռին ու փշրվում՝ շորս կողմը զարկելով աղի ջրի փրփրուն ցայտերը: Սակայն շուտով իմացավ Թառլանը, որ էն ծովն էր: Նա մնաց էնտեղ, կապվեց ծովի հետ, սիրեց նրա անսահման ընդարձակությունը ու իրեն ապաստարան ընտրեց ծովափնյա ժայռը:

Պատահում էր, որ էստեղ էին գալիս և ուրիշ արծիվներ ու հետը կռվի էին բռնվում որսի համար: Նա միշտ հաղթող էր դուրս գալիս, ամենիցն էլ ուժեղ ու սրաթուխ:

Մի անգամ էլ, երբ Թառլանը ձուկն էր բռնում, մի տարօրինակ անծանոթ զգացմունք տիրեց նրան: Օրեցօր զորացավ էն զգացմունքը, հետզհետե տիրեց... ու գլխի ընկավ, որ հայրենիքի կարոտն էր տանջում, քաշում իրեն: Անուշ ու քնքուշ կանչում էր նրան ծովի ձենը, բայց ավելի ուժեղ էր անապատի խոր կանչը: Ավելի ու ավելի համառ օր ու գիշեր նրա ականջում հնչում էր էն կոչը: Վերջապես Թառլանն էլ

չդիմացավ ու թռավ դեպի հյուսիս-արևելք: Շատ օրեր տևեց նրա թռիչքը, և ահա հյուսիսում երևացին հայրենի ժայռերը, ուր մի ժամանակ անց էր կացրել իր ջահելուժյունը: Ներքև՝ դաշտում, նրա բացակայությանը՝ մարդիկ շինել էին իրենց բնակարանները: Իր մոր խրատը հիշելով՝ նա թռավ նրանց վերևից: Հուզմունքով մոտեցավ էնտեղին, ուր առաջին անգամ աչքը բաց էր արել ու լուս աշխարհքը տեսել: Բայց հին բունը չկար: Նրա տեղը գտավ նորը՝ մեջը երեք ձու: Մենակի տխուր զգացմունքով հեռացավ Թառլանը հարազատ վայրերից՝ միտը բերելով իր մորն ու եղբայրներին: Էլ չվերադարձավ դեպի ծովը, շարունակ թափառում էր մի տեղից մի տեղ:

Մի անգամ էլ էնպես պատահեց, որ Թառլանը անտառի բերանով թռչելիս մի փոքրիկ փոսի մեջ տեսավ մի կենդանի ճագար: Գետնին զարկած ցցին կապված՝ նա աշխատում էր, որ ազատվի: Շեշտակի սլացավ արծիվը որսի վրա: Բայց ազատության մեջ մեծացած վայրենի հավքը չէր իմանում մարդու բոլոր խորամանկ հնարքները, բոլոր նենգամտությունը: Չէր նկատել բարակ ցանցը, որ պատում էր ճագարին: Հենց ուզեց նրան ճանկի՝ զգաց, որ ցանցը փաթաթվեց իր թևերին: Ազատ արծիվը գերի բռնվեց: Զուր էին ազատվելու բոլոր ջանքերը: Ամեն մի շարժման հետ պինդ թուղը ամուր ու ամուր պատում էր նրան: Էս ժամանակ մոտիկ քարի ետևից դուրս նայեց թուխ հնդիկ տղան: Նրա աչքերը փայլում էին ուրախությունից: Թառլանը տխուր ծղրտաց, ուզեց թևերը թափահարի — չկարողացավ... Օրհասական տազնապի մեջ կայծակի արագությունը նրա միտն եկան ու անցան մայրենի ժայռերն ու մոր պատմությունը.

— Քո հայրը, Թառլան, մի հզոր արծիվ էր... Զգուշացիր մարդ ասված հրեշից, երբեք չմոտենաս նրանց բնակարանին... Միտդ պահիր, Թառլան, ինչ որ ասում եմ քեզ...